

何苦而堅持偏議使子悶不得解病不能救將抱冤而死地下相見豈安於心宜好掾處置且代行延慰之禮豈予所欲非敢以封賊之故不徇見也病勢如此蓋出於不得已倘氣虛脚軟許多揖讓酬酢之際或致顛仆失儀則取笑華人所關非輕此子以為悶然此則當依啓辭行之此意并及焉○戊戌○夜一更二更南方坤方有赤氣一更至三更更有霧氣○己亥 上幸南別宮請與楊 冊使行上馬宴 上呼御前通事沈友勝曰請行陪臣行酒之禮 使曰勿為 上曰奉使三年今歸萬里不但體貌有缺於情亦有所缺然者矣願令陪臣以一杯餞別使曰領刑曹判書沈喜壽獻爵于 使前退又獻爵 上前訖 使曰日已暮矣道亦悠矣既受 國王親餞又飲陪臣行酒告辭 上曰禮未成情且未洽請益 使曰多謝益領 聖意 上曰小邦賊若再寇決不支持歸告 朝廷俾不再動全慶之間賊若更肆則小邦萬無支當且迫近山東地方賊之在彼尤不可也大人須將此曲折歸報朝廷赴賊未動善圖何如 使曰清正必不來清正勇而懷虛聲遠播以為恐脅須勿張皇因告歸 上曰 皇恩罔極小邦只仰 天朝洪造之力 使曰所言是矣但所望於 賢王者務在鎮靜民心而已○